

Nguvu Imeahidiwa

Maana umeshindana na Mungu, na watu, nawe umeshinda. Mwanzo 32:28.

Kama Yakobo asingekuwa ametubu dhambi yake ya kupata haki ya kumzaliwa wa kwanza kwa udanganyifu hapo kabla, Mungu asingeweza kusikia maombi yake na kwa rehema kuyaokoa maisha yake. Hivyo katika wakati wa shida, ikiwa watu wa Mungu walikuwa na dhambi zisizotubiwa ambazo zingeonekana mbele yao huku wakiteswa na hofu na maumivu makali, wangezidiwa; kukata tamaa kungeondoa imani yao na wasingeweza kuwa na ujasiri wa kumwomba Mungu kwa ajili ya ukombozi. Lakini pale wanapokuwa na hisia kali ya kutokustahili kwao, wangukuwa hawana makosa yaliyofichwa ya kudhihirisha. Dhambi zao zitakuwa zimefutwa na damu ya upatanisho ya Kristo na hawawezi kuzikumbuka...

Wote wanaojitahidi kutoa udhuru au kuficha dhambi zao na kuziruhusu kubaki kwenye vitabu vya mbinguni, bila kutubiwa na bila kusamehewa, watashindwa na Shetani. Kadiri weledi wao unavyozidi kuwa na hadhi ya juu na nafasi wanayoshikilia inavyozidi kuwa ya heshima, ndivyo njia yao inavyozidi kuwa ya kusikitisha machoni pa Mungu na ndivyo ushindi wa adui mkuu unavyozidi kuwa wa hakika.

Hata hivyo, historia ya Yakobo ni uthibitisho kwamba Mungu hatawatupa wale ambao wamesalitiwa katika kutenda dhambi, lakini wakarudi Kwake kwa toba ya kweli. Ilikuwa ni kwa kujikana nafsi na imani thabiti Yakobo alikipata kile ambacho alishindwa kukipata kwa kupambana kwa nguvu zake mwenyewe. Mungu kwa jinsi hiyo alimfundisha mtumishi Wake kwamba uweza wa Mungu na neema peke yake ndivyo vingeweza kumpa baraka aliyotamani sana kuipata. Hivyo ndivyo itakavyokuwa kwa wale wanaoishi katika siku za mwisho. Hatari zinapowazunguka na kukata tamaa kunapoishika roho, ni lazima wategemee sifa za upatanisho peke yake... Hakuna mtu hata mmoja atakayepotea maadamu wanalifanya hili...

Yakobo alishinda kwa sababu alikuwa mvumilivu na mwenye kudhamiria ... Ni sasa ndipo tunapaswa kujifunza somo hili la maombi yenye kushinda, ya imani isiyosalimu amri. Ushindi mkubwa kabisa kwa kanisa la Kristo au kwa Mkristo binafsi si ule unaopatikana kwa kipaji au elimu, kwa utajiri au upendeleo wa wanadamu. Ni ushindi ule unaopatikana katika kile chumba cha kukutana pamoja na Mungu, wakati ambapo imani ya kweli, yenye kuugua inaposhikilia mkono ule Wenye nguvu wa uweza.